

# Tge regiun(s) per il Grischun italofofon?

Ils concepts problematic da la regenza

DA GUIU SOBIELA-CAANITZ

■ **Il schaner ha la regenza publitgà ses concepts da refurma territoriala en in messadi al cussegl grond. Il messadi pertutga l'entir Grischun, schebain ch'el exista ussa mo per tudestg ([www.gr.ch/DE/Medien/Dossiers/Seiten/Gemeindegebietsreform.aspx](http://www.gr.ch/DE/Medien/Dossiers/Seiten/Gemeindegebietsreform.aspx)) e che blera glieud en las valladas italofofonas na sa betg uschè bain lez linguatg.** La gasetta emnila «Il Grigione Italiano» (Puschlav) ha publitgà in emprim commentari en chaussa en ses numer dals 3 da favrer. Ses collavuratur *Giancarlo Olgiati* ha questiuà *Sacha Zala*, parsura da la Pro Grigioni Italiano (pgi): «Mez favrer duai il cussegl grond discutar il messadi da la regenza davart (...) la refurma territoriala. Lez document prevesa da partir il chantun en 5–8 regiuns (...) che duessan remplazzar 2013 ils actuals districts e las actualas corporaziuns regionalas. Tge manegia la PGI?»

## Per ina «Regione Grigione Italiano»

Zala: «La PGI renconuscha ch'ins duai refurmar e simplifitgar la structura dal chantun. Dentant suna fitg trumpà, anzi, scurlattà che nagina da las quatter variantas proponidas da la regenza na tiria en consideraziun la soluziun la pli damainvla: Ina 'Regione Grigione Italiano' che correspundess a las quatter valladas italofofonas. La designaziun 'Grigione Ita-



Varianta per 8 regiuns.

MAD

liano' datti dapi passa 150 onns, numndamain dapi la fundaziun da la gasetta emnila 'Il Grigione Italiano' 1852. Fin avant pauc refusava la regenza sistematicain d'ans numnar cun noss agen num. Davos lezs concepts èsi perquai grev da na vesair ina tactica da 'divide et impera', pia ina clera intenziun da la maioritad da sfratgar la cuminanza grischuna dals umans italofofonas e d'als annectar ad autras regiuns per ch'i restian adina ina minoritad (...). Igl è ina dischonanur ch'il Grischun italofofon n'è betg re-

preschentà, ni tranter ils tschintg cussegliers guvernativs, ni tranter ils set parlamentarists grischuns sin stgalim federal. Tgi sa sch'i dettia in intent planisà d'impedir ch'il Grischun italofofon vegnia conscient da quai ch'el merita areguard dretg e justia? Mo uschia pudessa chapir la proposta balurda da stgaffir ina 'Regiun Artg sid' che tanschess da l'Engiadina Bassa fin en la Val Calanca». Olgiati: «Ina tala regiun dumbrass 40 000 olmas cun ina clera minoritad italofofona da var 12 000». Zala remartga che lezza

'Regiun Artg sid' na cumpigliass nagina cuntinuitad territoriala tranter la Bergiaglia ed il Mesauc, damai che Clavenna fa part da l'Italia. La regenza propona pia da crear ina regiun cun duas parts geograficain separadas; quai fiss sumegliant cun ina «Regione Grigione Italiano» en trais parts. Zala punctuescha: «La populaziun grischuna italofofona sto savair ch'ina regiun trilingua cun la maioritad alemana [da l'Engiadina Alta] resguardass strusch il talian, tant pli sch'ins fa endament la situaziun periclitada dal rumantsch en l'Engiadina». Olgiati: «Las cumpetenzas da las regiuns cumpigliassan t. a. la promoziun economica, il servetsch social, ils ospitals, las scolas professunalas, la protecciun d'umans minorens e creschids sco era las cumpetenzas giudizialas dals districts d'oz. Il linguatg è fundamental en tut questas domenas.» Zala: «E co! (...) In Bergiagliot d'oz che vul per exempel divorziar sto ir si San Murezzan e far tut per tudestg. I fiss ordvart lev d'instituir dretgiras italofofonas cumpetentas en l'entir Grischun italofofon (...). Ina 'Regione Grigione Italiano' na fasschess tuttavai betg donn a las relaziuns economicas e professunalas da la populaziun bergiagliotta e puschlavina cun l'Engiadina, (...) mabain muntass in servetsch public en lingua taliana per burgaisas e burgais italofofonas (...) che na fiss betg pussaivel en ina regiun trilingua.»